



REGIONE AUTÒNOMA DE SARDIGNA
REGIONE AUTONOMA DELLA SARDEGNA



COMUNU DE SESTU
TZITADI METROPOLITANA DE CASTEDDU



Ddu sciiast?

Ddu sciiast chi sa crèsia de santu Millanu est unu de is santuàrius de importu mannu de sa Sardìnnia de giossu?

Su logu: sa crèsia de Santu Millanu s'agatat in su sartu a intru de su territòriu de Sestu a 6 chilòmetrus de sa bidde.

A ingìriu de su sagrau ddoi est una pratza cun unu giardinu agratziau innui nci funt is statzionis de sa bia crucis e, in una funtana, unu trancafilu monumentali de orìgini romana. Prus a foras s'agatant is cumbessias chi serrant in tundu su santuàriu e chi si prenint de genti po sa festa in onori de su santu.

In custu logu in su mesuevu ddoi fiat una biddixedda nomenada Susue (chi est documentada de su 1316) ma is testimongiàntzias archeològicas ant amostau puru is arrastus de unu aposentamentu de su eneolìticu.

Sa Crèsia: su stilu architetonicu de custu tèmpiu religiosu, fatu de perda de cracina, est cussu de su romànicu. Is studiantis dd'ant postu, po cantu pertocat sa datatzioni, a intru de sa truma de is crèsias de su sèculu trexi.

Sa crèsia romànica immoi est cuada in sa faciada e in su ladu nord de fàbricus tiraus a pitzus in su Seixentus e Setixentus. De sa prima, partzia in duus de una lesena, s'allogant is portalis incroaus cun arcu de scàrrigu a perra de circu e is fentanas; a una luxi sceti cussa de dereta e a duus luxis cussa a manu manca.

S'agatant ancora a bista su ladu sud e cussu conca a est innui ddoi funt is duas àbsidis. In custus duus ladus ddoi at calincunu elementu tìpicu de su romànicu tardu cumentis is lesenas a sonetu e is archixeddus acutzus, de fitianu cun circus, acotzaus a peixeddus allonghiaus conca a foras.

A intru su fàbricu est a duas navadas, cun cussa de nord prus lasca de s'atra, aici cumentis s'absidi. A partziri su logu ddoi funt arcadas postas a suba de pilastrus cuadraus. Puru innoi, cumentis in santu Sarbadori, me in is crebeturas a carrada nci funt is arcus doubleaux, imprenta de is mòngius Vitorinus.



REGIONE AUTÒNOMA DE SARDIGNA
REGIONE AUTONOMA DELLA SARDEGNA



COMUNU DE SESTU
TZITADI METROPOLITANA DE CASTEDDU

